

東  
華  
續  
錄

東華續錄

同治八十六

臣王先謙敬編

臣張式恭恭校

六月丙申朔諭軍機大臣等曾國藩奏奉旨飭越天津恭摺覆陳一摺所稱民教起釁一案總以武蘭珍是否果爲王三所使王三是否果爲教堂所養空眼剖心之說是否確有證據爲案中最要關鍵審虛則洋人理直審實則洋人理曲等語可謂切中事理要言不煩卽著飭令派出之道員博多宏武等會同天津道府徹底根究妥籌辦理昨已特命崇厚充出使法國大臣其三口通商大臣派成林前往署理曾國藩眩暈之證見已十愈其八日內如可支持卽著前赴天津會同崇厚悉心商辦至傳教習教之人傷斃若干中國外國之人無故被害者若干皆須切實查明嚴拏兇手

以懲煽亂之徒彈壓土民以慰各國之意尤爲目前要務並著認真區畫妥速籌辦原摺著鈔給閱看○改廣東新設陽江直隸州爲直隸同知州判爲縣丞學正爲教諭吏目爲司獄○戊戌諭軍機大臣等福濟奏厄魯特人眾情願仍回布倫托海一摺前因厄魯特人眾流離困苦情形可憫特令福濟等妥爲安插乃該人眾始則自願東徙旋復任意逗留且有沿途搶掠情事實屬冥頑不靈見在該人眾既願仍回布倫托海業經福濟酌給牛羊銀兩等項令其折回著卽派員照料護送起程責成該管官沿途約束毋任滋生事端並著飭令巴彥特古斯等派員迎護催令迅速西行毋稍逗留經過科布多地方時著奎昌文碩一體飭屬護送俟其行抵布倫托海後卽飭該領隊妥爲收管俾安生業將此各諭令知之○諭奎昌奏起程赴塔勘辦立界事宜一摺奎昌接准俄國

來咨定於五月二十九日會勘塔城牌博兒已帶領司員弁兵等由科起程馳赴瑪呢圖噶圖勒汗地方按期與俄使會勘並先期派員查看俄國已立牌博有無侵占所籌尙是著卽將塔城立界事宜按照圖約會同俄使詳細履勘毋任暗中侵占以重疆界所需經費事竣覈實報銷奎昌因起程赴塔已將參贊大臣印務移交文碩接管所有科布多應辦事件卽著文碩妥爲經理將此各諭令知之○諭禁河南州縣私抽河東鹽釐○命文盛等酌撥福濟軍餉○庚子廣山東臨邑縣學額四名東平州二名臨朐縣三名陝西雒南一名○壬寅諭軍機大臣等左宗棠穆圖善奏分防各營剿賊獲勝並調兵剿辦竄匪一摺陝西賊匪自金積堡擊敗後復勾結河狄股匪分途竄擾經穆圖善飭令西路各軍迎頭截擊立將柳林湖等處竄匪擊敗其駐紮阿干鎮及安定各軍亦先

後勦賊獲勝惟碾伯縣及威遠營堡尙有陝回竄越並句結本地回匪肆行滋擾穆圖善見調懷義軍分隊援勦卽著左宗棠穆圖善飭令王仁和等乘勝追勦迅將西路敗匪悉數殲除檄令周惟翔等嚴防阿干鎮及安定一帶並飭唐有彥迅帶馬步各隊馳赴碾伯先解威遠堡之圍務將碾伯等處竄匪殲除淨盡一面嚴防本地土回毋令再行勾通外匪擾累地方將此由五百里各諭令知之○諭張廷岳奏撤兵回庫鄰盟尙有匪警暨嚴防賊匪竄擾各摺片前據福濟等奏股匪由原路竄回軍臺靜謐又據文盛奏賊匪向西回竄軍臺所屬境內見無賊蹤茲覽張廷岳所奏賽因諾顏部落官兵與賊接仗敗潰賊卽折回額爾德呢班第達呼圖克圖廟內烏里雅蘇台差探亦在沙爾噶勒珠特台親見並據扎薩克圖汗部落呈報賊有於六月間竄擾額爾德呢班第達呼圖

克圖廟後圖犯庫倫之語與福濟文盛等奏報不符著張廷岳阿爾塔什達再行確切偵探固不可掉以輕心亦不可聽傳聞無據之言轉致人心惶惑張廷岳見已帶兵回庫酌畱圖謝圖汗部落官兵防守額爾德呢等處並籌辦清野之法布置尙妥卽著會同阿爾塔什達認真防範總當持以鎮靜不得過事張皇至額爾德呢班第達呼圖克圖廟宇如何被陷應如何撥兵防剿之處著福濟榮全迅速查明妥爲辦理文盛亦當派委妥員隨時探明互相知照庶彼此聲息相通免致賊匪乘隙竄擾至賽因諾顏部落見在究竟有無賊蹤並著查明迅速具奏將此由五百里各諭令知之○癸卯雨 上詣 大高殿報謝○諭軍機大臣等曾國藩奏起程赴津籌辦情形一摺據稱教堂牽涉迷拐之案訊供稍有端倪尙未能確指證據等語此案起釁之由因迷拐幼孩而起總以

有無確據爲最要關鍵必須切實根究則曲直旣明方可再籌辦法著留國藩崇厚悉心會商體察事機妥籌辦理以期早日完案曾國藩擬將誤斃俄國人命及誤毀英美兩國講堂先行議結不與法國牽混所見甚是著卽會同崇厚妥爲商辦以免輕輟○丙午諭軍機大臣等蘇鳳文馮子材奏官軍攻剿叛匪疊破險隘見籌進逼一摺叛匪梁添錫遁入越南安邊地方勾結河陽踞匪黃崇英負隅抗拒經馮子材飭令副將劉玉成等分路進攻將那蓬坳及中芒等處險隘攻破見擬進逼安邊河陽並飛咨雲南督撫撥兵扼守邊境卽著蘇鳳文馮子材飭令前敵各軍迅速乘勝進攻務將梁添錫等悉數殲除肅清夷境毋得稍事遷延並嚴飭各將弁約束兵勇沿途毋許騷擾一面飛催雲南派防之兵將該省接壤地方嚴密堵截以杜敗匪竄越廣西邊境時有土匪滋擾亦

當嚴飭在防各軍加意扼守遇賊卽擊毋稍鬆懈一面保護運道  
俾前敵各軍糧餉不至缺乏方爲周妥將此由五百里各諭令知  
之○丁未諭軍機大臣等劉嶽昭岑毓英奏克復威遠廳城南路  
肅清一摺雲南普洱府屬之威遠廳久爲逆首馬標竊踞屢攻未  
下經劉嶽昭岑毓英飭令迤南各軍會同土練分路進攻力戰年  
餘始將廳城克復其田四濫一股在四疊崖一帶恃險抗拒亦經  
官軍破其巢穴生擒逆首田四濫正法南路肅清惟馬標一犯在  
逃未獲仍著該督等嚴飭所屬密速查拏懲辦毋任漏網田四濫  
餘黨並著妥爲解散安插免致滋生事端威遠爲大理後路與迤  
西聲息相通該處賊股業已殲除地方安謐正可乘此聲勢分路  
進規迤西使杜逆腹背受敵攻剿更易得手卽著該督等相機籌  
辦以期早日蕩平將此由五百里各諭令知之○移湖北武昌城



守營分防金口獐洲二汛外委各一於省城黃州協陽城把總於黃安縣城黃安縣外委於黃陂站巴河口塘外委於麻城縣之兩路口改道士汛外委隸興國營裁道士汛守備把總額外外委各一李家渡額外外委二金口獐洲李家渡兵丁共一百二十八名○己酉命彭玉麟迅赴江南會同沿江各督撫整頓長江水師○庚戌左宗棠奏東竄陝回逆目禹得彥李經舉河州逆目李阿渾等三月二十七日入甘肅甯州界賊騎竄近州城署甯州知州楊大年率城防勇丁數百截之賊卽斜掠南義井西向焦材道員魏光燾派防各營迎頭擊賊總兵夏奉朝遇賊馬方溝賊大隊奄至夏奉朝揮騎卒下馬結圍陣禦之槍礮環施賊不少卻鏖戰逾時勢幾不支總兵熊道演副將魏紀盞各率所部馳至賊始敗退是夜五鼓賊復向焦村奪路狂奔各營力扼之旋繞什社出銷金鎮

趙西峰維時魏光燾所部中營馬步已由慶陽西華池經鐵練川橫截而出二十八日黎明偵賊踞西峰南村李家堡魏光燾督隊出賊不意襲之提督戴佑勝副將鄭連拔參將彭邦達千總范潮海等奪堡門而入賊驚覺嗾悍黨死拒彭邦達范潮海奮勇直前身受矛傷遊擊黃有元都司劉乾福外委蔣宗福挺矛繼進刺傷悍賊數名賊陣始亂魏光燾督親兵從堡後猱附而上堡內踞賊無得脫者隨擣踞高莊之賊勇丁張貴元礮斃悍賊墜馬而奪其旗餘眾不戰而走正追殺閒賊後股數百騎自銷金鎮敗竄而來魏光燾回旗蹙之賊狂逸拜家河副將蕭玉元所部正擊敗西峰鎮前股竄賊於河岸賊瞥見官軍三面鈔擊梟水西奔人馬陷泥淖中多死者二十九日各營躡過達家河賊已奔鎮原屬孟壩寺矣是日黎明總兵江得意率隊截之西濠奪獲騾馬三百餘頭三

十日總兵蕭貴松率鎮原防勇隨副將李心海馬隊分途追襲賊不敢戀戰駛向固原州界連日之戰斃賊六七百名生擒四十二名各營弁勇傷亡三十餘名據獲賊供係逆目藍生元之弟藍生元綽號藍二紐子本長髮賊投入回中者二十八日經官軍殲斃於李家堡陝回頭目李經舉卽李金菊殲斃於高莊當官軍進擣高莊踞逆時一青馬賊手執黃旗指揮羣賊中礮落馬者是也禹得彥股內賊目禹三星過達家河礮穿左眼而斃賊目禹西娃子二十六日竄魚鱗川亦經官軍殲斃河回戴宋娃等供詞亦同四月初一日賊竄白家壩臣宗棠已豫派黃鼎一軍嚴裝以待比詞賊至卽由張家巖進發是夜四鼓成列以出分提督徐占彪統四營扼紅溝炭山一路自率馬步七營迎擊之初四日黎明抵白家壩賊正紛紛西竄黃鼎搥鼓疾進軍士併力壓之衝賊爲三段中

路之賊三百餘名登時鈔殺盡淨前後賊騎一轉白家壩一西趨紅溝黃鼎急令總兵黃有忠陳攀仙守備黃兆熊三營沿紅溝蹣賊親督總兵劉治均趙興隆副將黃虎臣遊擊李洪超馬步追過白家壩逼近懸巖賊擁擠不前軍士乘機衝殺斃賊二百餘名棄馬墜巖者約百餘名餘賊向炭山飛駛而去黃有忠等猛蹣之賊前股甫出韓家堡距黑城七八里適與徐占彪所部相值副將何玉超率壯士突起截擊立斃悍賊數十名徐占彪督各營馬步繼至縱橫盪決斃賊二三百名蹣近黑城子賊越城而西提督周紹濂派防黑城之總兵李良穆遊擊劉輔軍整隊疾起截之正在相持徐占彪之軍由東山鈔出賊腹背受敵轟斃刺斃又百數十名餘逆遁西山界牌初三日黃鼎分兵按山各營均有拏斬徐占彪率隊追界牌之賊及賊於黃羊坪斬尾賊百餘遊擊朱蘭亭帶親

兵數十併力窮追忽山谷中擁出悍賊百餘拚死格鬪朱蘭亭勢  
幾不支適徐占彪何玉超大隊倏至合圍該逆廢堡中悉數殲之  
訊之生賊始知此股悍賊卽固原回目單仲明甫從金積堡竄至  
紅溝擬隨禹得彥西遁單仲明已斃堡中矣禹得彥膽股騎賊三  
百餘向鹽茶廳鼠竄徐占彪復躡殺至鴉兒灣初四日收隊而還  
據良回楊如雨等報河回頭目丁阿渾本白家壩人同治二年叛  
附河州管河回五六百人此次隨米阿渾竄來經官軍擊斃於陣  
米阿渾之子米全喜亦斃於白家壩禹得彥教下頭目蔡福初三  
日斃於黃羊坪逆回馬六卽馬正和之黨去秋官軍截斷陝回於  
打拉城馬六遁入河州此次齊竄黑城子礮斃陣中其西竄之崔  
三一股三月二十日由隴州竄張家川周開錫比派提督王得勝  
一軍出清水迎剿提督梅開泰所部繼之總兵田連考道員湯麟

珍出秦州秦安之交遏賊南竄提督楊世俊總兵敖天印各軍出安定紅土窯而東聯絡堵截二十三日王得勝會提督丁桂智總兵王銘忠擊賊於清水正北之龔門鎮富家川地方賊正攻民堡急不虞官軍驟至也各營馬步從後蹙之斃賊四百餘名生擒四十二名躡二十餘里轉富家川休息賊之大股仍踞張家川蔓及正東十里之王家堡攻掠二十四日五鼓王得勝督隊踰山脊向王家堡進分馬步循平川徑擣賊巢上山隊伍較單賊勢迸注王家堡悉銳以拒官軍比馬步隊上山策應突遇伏賊首尾不能兼顧弁丁遇害者二百餘名王得勝斂兵保清水其時吳士邁之兵已躡賊之後由隴州收回秦州楊世俊敖天印之兵先後抵通渭賊畏官軍分道並進於二十五日越秦安龍山鎮連日避兵而行竄蓮花城田家坪朱家店蔓及靜甯屬之水洛城王得勝引所部

出西而北與田連考湯聘珍梅開泰之兵合初三日及賊於田家坪步賊分踞山腰馬賊馳騁平原王得勝湯聘珍等分左右路擊步賊陣斬數十名賊稍卻馬賊仍拌拒中路田連考謝復雲怒馬突陣手刃數賊餘眾大敗官軍三路躡至石門截殿後悍賊百餘名斬之初四日各軍及賊水洛城賊正與堡民相持瞥見官軍卽奪路狂竄提督高月桂李奉清緊躡之斬尾賊六十餘名初六日賊趨莊浪隆德正南門扇臣宗棠派徐文秀楊正茂馬步會同駐防隆德副都統全福馬隊截之賊遁靜甯四十里之威戎鎮初七日總兵蕭賞謙所部平江營截之賊卽由靜甯通渭之閒西趨蓋覓馬營監紅土窯爲歸路也楊世俊敖天印偵賊所向督隊疾出馬營李耀南亦派總兵周顯明自會甯率隊馳至嚴陣以待初八日賊大股竄近馬營正北二十里之傅家岔華家嶺十五里之

草芽溝雙墩堡地方初九日五鼓各軍分三路剿之楊世俊馬步抵傅家岔賊列隊抗拒官軍縱擊之斬賊數十名賊陣大亂敖天印正敗草芽溝雙墩堡之賊出傅家岔會隊兩面鈔擊賊之中槍墜馬者以數百計餘眾搶過華家嶺周顯明橫鈔之賊棄牲畜輜糧踰溝奔紅土窯參將楊德俊扼截於前各軍追逐於後悉數就殲殘騎數百遁馬家河以奔狄道正躡追聞諜報通渭東北三十里渭陽堡續到海澄王占鼃等逆一股時周顯明收隊靜甯楊世俊敖天印回軍剿之初十日未刻抵通渭縣十一日偵賊由縣南四十里之李家店葉家岔東南四十里之溫家峴馬家店分竄楊世俊進擊溫家峴之賊步隊迎戰斃賊數名賊勢披靡左右驍騎縱擊之斬馘以數百計緊躡至馬家店孫家坪陣擒尤夥李家店葉家岔之賊經敖天印張仲春馬步合擊之沿途賊屍枕藉僅賸



數十騎賊逸去

臣維陝回首逆禹得彥崔三李經舉自打拉池半

角城兩次大敗後兇骸已挫此次以金積陝回方竄擾陝西圖與

合勢遂糾河州回目米阿渾及狄道零股竄陝人數近萬吳士邁

李輝武截之寶雞陳村羅局兩獲大勝遂劃爲兩段禹得彥由白

水入山北竄疊經隴軍擊敗其得歸巢者亦不過數百人計陝回及河

州回竄疊經隴軍擊敗其得歸巢者亦不過數百人計陝回及河

狄之回漏逸者實不過十分一二耳崔三因勢更窮蹙上稟乞撫

周開錫批飭不准見檄各軍乘勝進剿五月初二初六兩日傅先

宗擊賊於鞏昌屬之丁家門新寺鎮等處兩獲大捷楊世俊及總

兵田連考等初十五等日擊賊於甯遠屬之大名頭廖家莊馬

塢李家溝門草塘河岷州屬狼渡灘等處十六十七等日副將管

春林等擊禮縣鹽關隴西等處之賊均有擒斬伏羌甯遠禮縣一

帶均已肅清南路諸軍見正進勦渭源以規狄道所有一切情形  
咨候查明續報中路各營見飭陸續前進安設糧局次第北行以  
規峽口規狄道者復河州之漸規峽口者奪金積之勢也又奏陝  
回各逆兇狡著名者馬上和楊文治而外以陳林余彥祿兩逆爲  
最金積堡乏食陝回老弱婦女餓斃者多陳林領三千餘眾出巢  
向花定一帶掠食四月初一日金運昌分駐定邊之都司牛允誠  
伺賊至督師敗之躡賊大矩灘斬殺八十名生擒十六名至初七  
日五鼓賊乘風雨交作襲攻花馬池城有賊十數已梯城而上提  
督隋君廷聞警率馬勇登城步戰城中文武紳士亦併力堵賊於  
巷口賊之已入城者登時殺盡天明隋君廷開城擊賊躡殺十餘  
名生擒四名賊負創而遁初十日賊竄安邊攻王家寨副將宋雲  
田督參將李占標遊擊邵維常隊伍分道赴援立解堡圍斃賊六

十餘名追至橫流溝賊返鬪又經官軍奮擊而走十二日黎明賊  
盡至定邊攻城牛允誠揮隊擊之殺賊三十餘名賊敗竄甄井鎮  
守備王克功伏兵東關橫截而出斃賊四五十名生擒九名十三  
日賊西竄安邊境攻李家寨寨垂破矣宋雲田率隊掩至賊駭而  
奔官軍躡追五里至白家寨賊眾千餘合勢拚拒宋雲田躍馬突  
陣部眾繼之鏖戰逾時賊敗走擒斬百餘名併斬逆目楊葫蘆二  
十五日提督王鳳鳴護餉抵甄井誦賊踞瓦渣梁楊家寨督隊疾  
擊之斃賊三十餘名生擒五名二十七日牛允誠隊伍出定邊而  
東王鳳鳴隊伍出甄井而西兩路鈔擊斃賊八九十名生擒十五  
名二十八日賊繞甄井迤東之魯家峁王鳳鳴截斬四十餘名二  
十九日五鼓乘賊熟睡襲破其巢斬悍賊百四五十名其敗逸定  
邊者又經王克功斬獲四十餘名生擒十四名據賊目余金兒供

余澤祥之弟馬化澂族隨陳林東掠圖得花定安邊各城絕金  
前敵官軍運道十二日甌井鎮之戰陳林中微傷甚重訊畢斬  
之方陳林之挾眾東趨也劉錦棠黃萬友慮後路接餉隊伍單薄  
四月二十二日令總兵沈先梅率馬隊數十騎赴花定偵探午刻  
抵磁窯鎮獲賊諜供陳林自花馬池田家掌派逆目楊興隆帶數  
百賊護糧回金積將至矣比飛報劉錦棠添兵截剿二十三日劉  
錦棠伏兵靈州東南十餘里之懽喜梁以待辰刻賊眾擁糧畜而  
西官軍馬步左右突起擊之馬賊返跑步賊棄輜重四竄劉錦棠  
令軍士分途壓剿副都統雙壽遊擊郭宗儀馬隊東追馬賊提督  
蕭章開噲執益譚拔萃余虎恩周雪祥譚上連曾松明軍功張俊  
隊伍追步賊各路悉銳衝殺賊無脫者是役斃悍賊六百數十名  
陣斬逆目楊興隆奪騾馬牛羊八百餘頭雜糧二萬數千斤并勇

陣亡二名受傷八名二十六日提督李雲貴軍功李雙良行隊自  
綏德護餉過定邊遇賊會同署定邊協副將王雲孚防兵兩路迎  
擊斃賊百餘名并勇陣亡六名二十七日提督何作霖余虎恩馬  
步出花馬池接餉途遇數十賊騎斬數名據獲賊供陳林尙盤踞  
田家掌迨各營進剿賊已趨定邊甌井一路二十八日金運昌  
之軍敗賊於甌井魯家峁卽係此股臣接據北路軍報得陳林東  
竄之信卽檄提督劉端冕會合陝北各軍妥籌防剿道員魏光燾  
嚴扼環慶一路五月初十日三鼓劉端冕詞逆眾竄鄜州屬之油  
坊比派所部從巴掌窪和尚塬分左右路迎擊自率馬步出黑水  
十一日辰刻抵王家角驢遇賊騎劉端冕以馬隊夾步隊而陣槍  
礮環施賊猶死拒適總兵陳光明副將黃承佐隊伍循巴掌窪山  
脊壓下併力撲之追賊至張家灣總兵文明章副將溫宗秀又自

和尚源截出賊首尾受敵踰溝狂奔各營乘之斃賊五百餘名生擒一百一十三名據獲賊洪起益等供陳林在甄井負創受傷極重隨帶死黨轉金積分馬步賊一千餘交逆目馬長元趨定邊甯條梁圍竄山外掠食不料遇官軍擊敗訊畢斬其悍黨八十名釋散脅從三十一名連日劉端冕分派各營循將臺一路迤東而北四面搜山沿途遇賊或十餘一起或數十一起覓路歸巢官軍前截後追擒斬又不下百數十名其由府泉敗逸甘泉屬者經提督劉聲集所部截殺數十名餘賊向保安縣北遁計不過百數十騎而已其零股數百由廟村西奔合水縣屬之固城川提督甘大有截之斃賊百餘名生擒二十三名十八日魏光燾派總兵夏奉朝馬隊禦賊於襄樂小有挫失賊趨甯州東五十里之蘇家川署甯州知州楊大年派副將銜參將譚新盛都司銜守備盧春林率甯

州防勇於二十日三鼓襲之斃賊四十餘名生擒二名勇丁受傷  
三名餘逆趨正甯之平子鎮出邠長交界之白吉塬亭口竄靈臺  
邵寨魏光燾親督所部自慶陽追賊而東二十二日及賊邵寨頗  
有擒斬賊復西竄臣復飭副將彭清和都司熊祥麟率所部馬步  
截賊崇信斬騎賊數十訊據生擒賊供陳逆腰傷礮子未出不知  
死活黨眾殲戮殆盡余彥祿悍黨存亦無幾馬化澂及其子耀邦  
復哀詞乞撫並繳馬七百匹槍械五千餘件劉錦棠仍未准撫臣  
見檄雷正綰黃鼎率所部進規峽口並飭各營分道北進自當慎  
以圖之上諭軍機大臣等陝回禹得彥崔三等股疊經官軍擊  
敗漏逸無多傅先宗等復擊賊於鞏昌等屬伏羌甯遠禮縣一帶  
均已肅清丁宜乘此聲威節節掃蕩著左宗棠飭令南路各軍迅  
由渭源進剿以規河狄毋稍遷延峽口要隘爲賊所踞尤當迅飭

雷正綰等力圖攻拔以奪金積之勢其陳林一股竄擾花定一帶  
經金運昌劉錦棠各軍擊敗陳逆受傷而遁見在陝回疊經受創  
金積賊勢漸孤左宗棠務當飭令劉錦棠等穩慎進取力拔堅巢  
該逆被圍緊急難保不遣黨四出圖擾後路並著嚴飭環慶等處  
防軍會合陝北各軍嚴密布置遇賊卽擊毋稍疏懈省城附近及  
西路一帶時有匪蹤竄擾著穆圖善隨時酌量情形力籌防剿左  
宗棠亦當妥籌兼顧將此由六百里各諭令知之○予甘肅陣亡  
總兵官江登雲等祭葬世職○辛亥諭軍機大臣等匪徒迷拐幼  
孩大千例禁著步軍統領衙門順天府五城一體嚴拏如有遺失  
子女向各衙門呈報者立即派委員役認真緝拏止須人藥並獲  
供證確鑿卽著解交刑部按律懲辦毋任藉詞牽連致稽顯戮將  
此各諭令知之○癸丑諭軍機大臣等據定安奏鄂托克烏紳兩



旗境內均有馬步回匪竄擾經烏紳旗管帶官赤樓多爾濟督隊  
擊敗旋在白興埽斃賊甚多餘匪逃至托霍里木廟東來賊匪與  
之合股盤踞赤樓多爾濟以力戰陣亡該逆遂分股向正北東南  
竄擾復經官兵於托諾圖西里地方敗之追殺餘匪並奪獲什物  
無算參領拉什札木蘇等亦卽戰歿見在逆股四散擬令巴圖那  
遜管帶各營以資追剿等語此次回蹤紛竄雖經蒙兵連番擊退  
而餘匪逃逸尙多邊外地方遼闊亟應厚集兵力遏賊東趨卽著  
定安嚴飭巴圖那遜督率烏紳旗托霍尼圖官兵視賊所向相機  
追擊並一面檄令巴達爾琥隨時偵探力籌防剿不可稍涉疏虞  
將此由五百里諭令知之○甲寅諭軍機大臣等都興阿奏查勘  
邊荒辦理情形一摺奉天靉陽門至鳳凰門一帶邊荒經都興阿  
等派員分段查勘九十一處因大雨時行路多阻隔擬將未經查

勘地方俟秋後再行查勘雖係實在情形惟未查地畝尙多若不趕緊辦理任聽該委員等藉詞宕延將來大雪封山更難剋期辦竣著都興阿額勒和布恩錫嚴飭該委員等屆時迅速出邊將未查地畝一律查勘完竣造冊報部覈辦不准再事遷延將此各諭令知之○建奉天岫巖廳 文廟學宮設訓導一文學額四名武學額二名○乙卯諭軍機大臣等福濟榮全奏竄匪復擾臺站籌辦防剿事宜一摺據稱推河迤西額爾德呢呼圖克圖招等處又有竄匪五六百人持械搶掠哈爾尼敦防堵蒙兵潰散賊匪向西竄回與張廷岳前奏大略相同沙爾胡彙蘇地方亦有賊股滋擾並有仍入喀爾喀搶劫召廟商人撲犯烏城之說邊外道途寥闊處處可通若不趕將竄匪剿除必致蔓延爲患福濟等見已酌撥兵勇赴臺防堵並咨綏遠城察哈爾撥隊會剿卽著定安迅撥馬

隊五百名酌給軍裝口糧前赴哈爾尼敦一帶堵禦其由綏撤回見紮賽爾烏蘇馬隊五百名著文盛派令馳赴哈爾尼敦一同防剿福濟等所調滿綠營索倫官兵著卽趕催到齊會同前項馬隊併力兜剿務絕根株惟賊蹤飄忽難保不此剿彼竄軍臺一帶各宜加意偵探認真防範著定安福濟榮全文盛張廷岳阿爾塔什達探明確蹤隨時互相知照免致賊匪伺隙奔突福濟前請撥軍需銀兩當令察哈爾撥銀二萬兩並令張廷岳等酌量庫倫情形亦勻撥餉銀二萬兩此外尙有新疆協餉銀兩著戶部分別咨催迅解烏里雅蘇台交福濟等應用以資接濟將此由五百里各諭令知之○永定河溢○戊午諭軍機大臣等前據曾國藩奏本月初六日起程赴津見抵該處已逾多日此案起釁根由想該督必已詳細查明妥爲籌辦矣迷拐一案究竟有無確據此係緊要關

鍵卽著該督迅速具奏以慰雇繫並將見在籌辦之法及該處近日民情一併奏聞崇厚已派出使法國自應及早啟行著曾國藩體察情形如崇厚此時可以交卸卽著該侍郎先行來京陛見以便卽日起程其通商大臣事務著曾國藩暫時接辦成林見已病痊銷假不日亦可馳赴天津俟該京卿到時曾國藩卽可將通商事務交卸將此由五百里各諭令知之○庚申諭內閣曾國藩崇厚奏查明天津滋事大概情形一摺據稱研訊教民迷拐人口一節王三雖經供認授藥與武蘭珍然尙時供時翻亦無教堂主使確據仁慈堂查出男女一百五十餘名口均稱其家送至堂中養並無被拐情事至乞眼剖心一條經曾國藩於抵津時親加推問百姓無能指實詢之天津城內外亦無遺失幼孩控告之案此等情形如湖南江西揚州天門及直省之大名廣平皆有檄文揭

帖紛傳不一厥後各處結案總未將檄文揭帖之虛實剖辨明白  
津民平日熟聞各處檄文揭帖之言已信爲實而又因外國堂門  
終年扃閉教堂仁慈堂皆有地窖爲去潮溼置煤炭之用治病者  
被畱不出並收畱無依人口及疾病將死之人等情蓄疑莫解本  
年四五月間適有拐匪用藥迷人之事牽涉教堂該民人見領事  
官豐大業對官放槍遂致萬口譁譟同時並舉其實空眼剖心戕  
害生民之說多屬虛誣毫無實據等語此案疊諭曾國藩會同崇  
厚持平辦理見據該督等奏報此事均係謠傳津人致疑之由昭  
然共見外省地方遇有此等謠言羣疑亦可消釋至匪徒迷拐幼  
孩人口例禁本嚴惟恐日久玩法著刑部於此等兇犯到案時卽  
議以加等治罪嗣後各直省地方如拏有迷拐人口匪徒亦著照  
刑部所議從重處治以儆兇殘京師爲首善之區尤宜按查匪類

並著步軍統領衙門隨時緝訪遇有此等匪徒卽行拏交刑部加等治罪○諭軍機大臣等曾國藩崇厚奏查明天津滋事大概情形一摺該督等見給該使照會於緝兇修堂等事均已力爲應允想該使自不至再生異詞日來辦理情形能否迅就了結並著隨時馳奏沿江沿海各督撫本日已有寄諭令其嚴行戒備陳國瑞當時是否到場到津後卽可質明虛實已令神機營飭令該提督赴津聽候曾國藩查問矣○以直隸天津疏防民教啟釁革知府張光藻知縣劉傑職下部治罪○予湖北陣亡道員張汝瀛建祠○辛酉諭軍機大臣等左宗棠穆圖善奏官軍剿賊獲勝威遠堡解圍一摺回逆圍攻威遠堡經唐有彥帶隊在花園寺等處迎擊該逆潰遁立解堡圍鎮番縣屬沙窩地方復有賊匪圍攻民堡並有馬賊直抵鎮番城下窺伺亦經韓廷芝等擊退其古浪縣屬之

王家莊等處賊匪疊經常明等擊勦連獲勝仗斃賊甚多勦辦尙屬奮勇惟威遠堡一股勾結陝回尙踞白馬寺一帶而鎮番及秦旺川各隘零星股匪仍恐出沒無常阻我糧運著左宗棠穆圖善督飭各軍將白馬寺等處踞逆相機痛勦並將零星各股就地掃蕩毋使糧路再有梗塞將此由五百里各諭令知之○諭劉峴奏官軍疊克苗寨收復巖門司城池北岸大致肅清一摺援黔各軍自踞平涼繳地賊巢及拔取新城後卽約川軍會師巖門經席寶田督飭鄧真發等軍分路進攻將亮擺高山各寨焚毀官軍乘勝轉戰陣斬逆酋多名並將白洗等處援賊痛擊先後計毀平數十苗寨五月初十日席寶田飭唐本有等分攻巖門賊匪大敗立將巖門司城池克復適川軍亦克寶谷隴川楚兩軍勢已聯絡見自巖門以下白洗以上數百里間悍苗斬除淨盡大致肅清其高碑

花灘等處巖洞亦經席寶田飭軍進剿清平所屬之螃蟹數寨川軍亦可進取所有此次援黔出力人員著准其附於攻克施洞口案內彙請獎敘毋許冒濫刻下北岸各軍雖屬得手而南岸地勢袤廣苗寨尙多即使攻拔台拱其丹江入寨一帶賊巢林立且去貴陽省垣猶遠必須合軍進剿方無後竭之虞仍著劉崐檄飭席寶田將未克巖洞迅速攻拔一面督令唐本有等及果毅各營與川軍併力南圖毋稍鬆勁川軍旣與楚軍會合著吳棠飭令唐炯迅率所部相機夾擊以期埽穴擒渠並著將各該軍餉項源源撥給毋令稍形困乏黔邊援軍四集曾璧光亦當振刷精神就該省見有兵力督飭在事將士分投剿擊共殄寇氛將此由五百里各諭令知之○諭劉嶽昭岑毓英奏官軍攻克姚州城池擒斬首逆餘賊殲除淨盡一摺姚州首逆馬金保藍平潰等皆與杜逆同時



構亂著名兇悍之賊此次官軍力拔堅城擒斬逆首從此杜逆黨  
與漸孤進剿當易得手著劉嶽昭岑毓英督飭李維述一軍迅拔  
鎮南州城卽與楊玉科等軍相機分路前進以期早日蕆功另片  
奏徵江竹園剿賊獲勝等語徵江賊匪經岑毓英督率各軍於龍  
潭校場蘿蔔村及西山村一帶攻破賊營賊礮數十座陣斬賊首  
多名其竹園賊匪亦經總兵張保和等督軍進攻連破營礮二百  
餘處殲賊二千餘名東西兩山夷寨望風歸順竹園下壩地方均  
已肅清仍著岑毓英嚴飭各軍乘勝攻剿迅克徵江郡城並將竹  
園上壩賊巢一律掃蕩以靖邊陲將此由六百里各諭令知之○  
廣江西新城縣學額一名雲南昆明三名江蘇宜興二名河南鄭  
州一名○予貴州陣亡參將黃守田等祭葬世職○壬戌諭內閣  
慈禧皇太后之母承恩端恪公夫人溢逝 慈衷哀慟悲不自

勝朕仰體

孝思中懷莫釋著由內賞銀三千兩交照祥等祇領

經理喪事

○癸亥諭軍機大臣等天津滋事一案前經派令曾國

藩前往查辦本日據崇厚奏稱該督病證復發臥牀不起勢甚危

篤事機十分棘手等語本日已派毛昶熙前往天津會同曾國藩

辦理並令丁日昌由海道赴津幫同商辦惟該國既有兵船到津

亟應豫籌備禦曾國藩病勢甚重一時實乏知兵大員可資戰守

刻下陝省軍情稍鬆著李鴻章移緩就急酌帶郭松林等軍剋日

起程馳赴近畿一帶駐紮屆時察看情形候旨調派見在事勢緊

急該督務須迅速前進毋稍遲誤其陝省防勦事宜卽著知照左

宗棠蔣志章妥籌辦理○命工部尙書毛昶熙馳赴天津會同直

隸總督曾國藩查辦事件○甲子以孟秋時享 太廟 上前期

親詣行禮○諭軍機大臣等曾國藩奏遵旨覆陳一摺洋人挖眼

剖心之事據稱查無確據崇厚亦無消滅情節此事著毋庸議至滋事正兇見已拏獲九人卽著曾國藩等督飭道府悉心研究起釁根由如尙有未獲黨與仍一面隨時緝拏嚴行懲辦崇厚與洋人交涉日久此時情形正緊著准其暫緩來京與曾國藩妥籌辦理天津府縣議抵一節斷難允准該督照覆羅淑亞之言亦頗詳晰該使當不至固執前意設詞要求已派毛昶熙赴津會辦該尙書於七月初二日起程抵津後一切應辦事宜著該督等與之斟酌緩急相機籌辦昨諭李鴻章酌帶所部剋日馳赴近畿一帶駐紮以爲津郡聲援曾國藩見又令張秋全隊拔赴滄州該督等務竭力籌維以期速了片內所稱善全和局以爲保民之道備豫不虞以爲立國之本甚屬曲中事理卽著該督堅持定見悉心經營用全大局○予湖北殉難知縣何開泰建祠

秋七月乙丑朔諭丁寶楨李鶴年整頓武備○予江蘇陣亡內閣中書鍾淮建祠○丙寅諭軍機大臣等豫師奏威遠堡解圍見籌募勇進剿並請飭催俸餉一招據奏威遠堡解圍情形與左宗棠等奏大略相同豫師見派參將李春海等先赴平番募勇惟左宗棠借發餉銀尙未解到豫師擬俟軍裝配齊卽行出省著左宗棠將先後借發西甯餉銀四萬兩迅速解交豫師應用並著豫師飭令李春海等趕將勇丁募齊選練成軍卽日統率西上會同唐有彥等軍相機堵剿將白馬寺等處賊匪悉數殲除毋得遷延番兵剿賊得力豫師擬酌調蒙番各部助剿據稱該王公俸餉及番子酬賞經費久未發給山西奉撥該蒙古俸餉等銀亟應迅籌接濟著李宗義嚴飭藩司將該省奉撥蒙古王公俸餉並剿撫經費銀共十二萬五百兩迅速如數籌撥解交豫師以濟要需將此由五

百里各諭令知之○戊辰諭內閣富明阿等奏琿春邊務事繁請將該處協領賞加副都統銜以資鎮攝等語琿春協領訥穆錦著賞加副都統銜嗣後琿春協領一缺卽作爲副都統銜協領永爲定制○己巳飭催各省迅解京餉○庚午卞寶第開缺養親以何璟爲福建巡撫張樹聲爲山西布政使范梁爲山西按察使由山東鹽運使○辛未諭軍機大臣等崇實奏查辦遵義教案起程日期一摺貴州遵義教案日久未結自應迅速審辦崇實見於六月十六日自省起程先赴重慶駐紮將遵郡紳民開導再密與曾璧光相機妥籌雖係慎重辦法惟重慶與遵義界分兩省查辦大員未入黔境此案終難早結著崇實體察情形仍遵前次諭旨馳抵遵義督飭楊蔭棠余思樞等持平妥辦以期民教相安免生枝節將此由五百里諭令知之○壬申予浙江殉難知縣楊炳春祭葬世職

建祠○甲戌諭軍機大臣等毛昶熙奏抵津日期並會商大概情形一摺羅淑亞擬回京商辦諸事英國使臣威妥瑪亦勸其回京據毛昶熙奏稱此案全在地方官設法議辦就近與該公使商酌及早了結若任令回京轉恐往返函商致稽時日等語所籌甚是著曾國藩毛昶熙崇厚悉心會商與羅淑亞就近在天津迅速議結毋令該公使回京致此案轉形稽滯至爲首滋事之犯著仍遵前旨趕緊緝拏以爲轉圜地步曾國藩等務當妥速籌辦上維國體下順輿情以期力保大局將此由五百里各密諭知之○諭劉岷奏楚省援黔各軍擬暫緩南圖一摺據稱湖南自援黔以來歲需餉銀甚鉅積欠已多湘中近日情形尙須防維補救自固根本擬飭席寶田設防清江北岸清理善後事宜俟川黔兩軍得手再派兵南渡夾擊等語黔省清江北岸業已肅清正宜乘此聲威進

規台拱將南岸各苗寨次第埽除以期一勞永逸若半途鬆勁軍務安有了期劉岷慮竭湖南之力不能竟事先無以對湘民未免畏難自阻見當天氣盛暑援黔各軍著照該撫所請暫予休息卽著檄令席寶田趁此頓兵未進之時迅將鎮恩施黃各屬善後事宜依次興辦務臻妥實一面將積欠軍餉設法清釐轉瞬秋涼仍當迅速進兵蕩平南岸以竟全功毋得惑於人言轉致事機遲誤各營如何裁汰歸併亦著該撫酌量辦理以節餉需本省團防事宜甚關緊要該撫仍當督飭各屬實力整頓以備不虞川省援軍亦不得稍存觀望致失機宜著崇實吳棠飭令會合楚軍相機夾擊曾璧光身任黔撫責無旁貸務當嚴檄各營隨時策應川楚各軍認真勦辦早靖疆圉將此由五百里各諭令知之○諭戶部撥銀十萬兩備古北口蒙古官兵月餉○乙亥諭軍機大臣等李鴻

章奏酌帶各軍剋日起程並代奏袁保恆請赴直效力各摺片天津之事見經毛昶熙前往會同曾國藩辦理李鴻章見已飭令郭松林周盛傳等軍分起起程並先帶親軍八營取道山西馳赴近畿實能忠勇任事深慰廑懷該督馳抵直境後應駐紮何處屆時再行請旨辦理袁保恆見辦西征糧臺情形較熟未便遽易生手所請赴直效力著毋庸議李鴻章另片奏請飭劉銘傳赴營前已諭知曾國藩飭令該提督赴直統帶銘軍本日復諭英翰催令迅速起程至所陳詢明羅使所聞張光藻等主使有何證據亦已諭令曾國藩等商辦矣將此由六百里諭令知之○諭傳諭直隸按察使錢鼎銘已革天津府知府張光藻已革天津縣知縣劉傑前經曾國藩奏明交部治罪惟該革員等應得之罪亦應在津取有親供質訊明確再行交部覈辦方昭平允著錢鼎銘卽行派員將



該革員等解往天津聽候質訊○丙子諭軍機大臣等曾國藩等奏法使仍執前議徑行回京商辦一摺羅淑亞所請府縣抵償一節萬無允准之理昨已傳諭錢鼎銘將張光藻等解赴天津並令曾國藩等取具該府縣親供照會該使以期迅速了結今羅淑亞既因不遂所欲悻悻回京此時中外一心非理之求總理各國事務王大臣自能堅持力拒曾國藩等仍當將緝兇等事趕緊辦理不得因該使業已來京稍涉鬆勁另片奏請將福建船局購辦京米截畱二萬石存儲津郡備李鴻章軍營及銘軍全隊之用係爲豫籌兵食起見著照所請行將此由五百里各密諭知之○予貴州陣亡副將周發榮祭葬世職○丁丑諭軍機大臣等崇厚奏體察津郡見時情形擬卽來京陛見一摺崇厚著卽來京其三口通商大臣一缺著毛昶熙暫行署理崇厚卽將關防交毛昶熙接收

毋庸攜帶來京津門應辦事宜仍著曾國藩毛昶熙懷遵疊次諭旨妥速籌辦將此各諭令知之○己卯諭軍機大臣等曾璧光奏黔省教案全行議結開單呈覽暨咨會崇實會同覈辦各摺片貴州遵義等處教案共有九起見經曾璧光派委司道各員會同該教士逐案查明一律歸結擬卽出示曉諭各屬以後遇有民教交涉事件均照條約辦理所籌甚爲妥協著曾璧光卽將各案如何議結詳細根由迅速咨明總理各國事務衙門以憑查覈黔省教案雖已全結而設堂行教等事尙須妥籌辦法該撫務當飭令余思樞蹇闇會同楊蔭棠等體察民情設法開導毋令再生枝節仍隨時咨商崇實酌覈辦理免致歧誤並檄飭地方官嗣後務當持平辦理毋任再滋事端前有旨令崇實馳赴遵義就近督辦此時遵義教案已結尙有設堂行教事務亦須督率委員逐一經理操

縱方合機宜崇實應否仍赴遵義之處著卽酌量情形以定行止將此由五百里各諭令知之○庚辰有星西北流大如盞○辛巳諭長善等整頓廣州駐防旗營○壬午諭軍機大臣等李鴻章於行抵直境時酌度情形卽將所帶各營扼紮直隸邊境獲鹿一帶或於河北彰德山西平定等地方分紮務須不動聲色持以鎮靜用昭愼密至正定廣平等處均有洋人教堂李鴻章務當就近彈壓兵民毋許滋事免致別生枝節○甲申諭軍機大臣等本日據軍機大臣呈遞直隸按察使錢鼎銘稟函據稱已革天津府知府張光藻因病出省在順德府調治已革天津縣知縣劉傑亦在密雲縣治病已派員分赴守催等語覽奏不勝詫異張光藻劉傑以奉旨治罪人員卽使患病屬實亦應在天津聽候查辦乃該革員等一赴順德一赴密雲捏病遠避直視諭旨如弁髦尙復成何事

體試思該革員等不呈遞親供辨別是非總理各國事務衙門王大臣等與洋人終日辯詰何能以空言相抵朝廷之令該革員等赴津者實曲示保全之意乃皆不能體會脩然置身事外若使洋人聞之豈不益滋口實此事關係重大不可再涉遷延著錢鼎銘懷遵前旨星夜派員前往將該革員等迅解天津不准藉詞託病仍著將起解日期趕緊覆奏曾國藩於張光藻等革職後率行給假他出實屬不知緩急並著派員勒限催提俟解到日會同毛昶熙取具該革員等確切親供以憑覈辦若再託詞遠避國法具在豈能寬宥將此由五百里諭知曾國藩並傳諭錢鼎銘知之○諭李鴻章奏勦辦北山土匪潰勇業經就緒並遵旨分兵馳赴近畿各摺片陝西北山土匪潰勇糾聚宜川洛川一帶股數眾多李鴻章派令周盛傳等督隊進攻在老澗鋪十梅溝等處疊獲勝仗拏

斬逆首多名餘匪潰散復經各營分路鈔洗見在已無成股之賊  
地方漸就肅清剿辦尙爲得手北山巨股賊匪見已殲除餘匪仍  
當搜捕淨盡地方一切善後事宜尤須妥爲經理李鴻章已帶同  
周盛傳所部馳赴近畿蔣志章身任陝撫責無旁貸卽著酌派得  
力官兵三五營分紮北山各要隘以資彈壓並派廉幹地方官妥  
籌招徠賑墾等事宜以期日有起色前有旨令李鴻章行抵直境  
時將所帶各營分地扼紮該督已於本月十四日渡河見擬由晉  
省取道井陘入直並飭周盛傳一軍分起渡黃至平陽會合齊進  
郭松林一軍暫紮衛輝彰德與十八日諭旨適相脗合卽著飭令  
郭松林暫紮衛輝彰德一帶與劉銘傳所部遙爲聲援並飭周盛  
傳卽在平陽平定暨井陘獲鹿一帶分段扼紮總以防回匪竄擾  
爲名不動聲色持以鎮靜並著李宗羲李鶴年於各該軍到時妥

爲照料不可稍涉張皇將此由五百里各諭令知之○丙戌諭軍機大臣等曾國藩奏遵旨函致彭玉麟等能否再出續行覆奏等語彭玉麟等受恩深重當此國家多事之秋自應力圖報效著曾國藩於接到彭玉麟楊岳斌覆信時卽行具奏候旨簡用劉銘傳勇往過人治軍有律據曾國藩奏稱此次催令來直可否稍示優異著俟劉銘傳到直後再行聽候諭旨曾國藩所陳治海上水師與江上水師截然不同苟欲捍禦外侮徐圖自強非持以一二十年之久未易收效然因事端艱鉅畏縮不爲俟諸後人則永無自強之日茲值閩滬兩廠船成卽當於兩處選將操練各情所籌切中竅要近來內外臣工往往遇事機緊急徒事張皇迫禍患略平則又泄沓成風爲目前苟安之計卽使剗立戰守章程而在事諸臣奉行不力事事有名無實遂使朝廷深謀遠慮均屬具文似此

因循成習何時可冀自強何時可平外患宵旰焦憂無時可釋見在閩滬兩廠輪船次第告成著馬新貽丁日昌英桂沈葆楨於兩處各擇統將出洋操練無論有警無警窮年累歲練習不懈方可備不虞而操勝算廣東亦應籌備輪船巡防海口著瑞麟李福泰一體認真辦理以上各輪船務須均用中國人駕駛以期緩急足恃至各省將備中如有材具出眾熟習風濤沙綫者著各該督撫隨時保奏以備擢用卽山林草野之中有長於海戰者亦當隨處畱心物色量材超擢庶材能以按羅而出將士皆干城之選矣此外如另有備禦之策並著該督撫等全局統籌隨時具奏該督撫等均爲國家重臣務當實心任事爲嘗膽臥薪之計共挽時艱以副委任曾國藩原片均著摘鈔閱看將此由五百里各密諭知之

○李宗羲丁憂調何璟爲山西巡撫以王凱泰爲福建巡撫

由廣東布

政使

○丁亥調鄧廷枏爲廣東布政使以潘蔚爲福建布政使調

棣亨爲福建按察使以林肇元爲貴州按察使

由督糧道遷

○戊子飭

催兩淮長蘆山東商欠東河息銀○己丑諭軍機大臣等本日據

景豐奏派員會解革員起程赴津等語已革天津縣劉傑見經景

豐派委佐領恩福等協同委員王霖於本月二十二日押解起程

密雲距津甚近不日可到張光藻亦已由錢鼎銘派員解送天津

卽著曾國藩毛昶熙取具該革員等確切親供迅速覆奏所最喫

緊者緝拏正兇如能將爲首滋事及下手之人嚴拏務獲訊取確

供按律議抵大局似可脩定該督公忠體國朝廷素所倚賴慎毋

因循退蕙稍涉遲回毛昶熙會辦一事責無旁貸當無不迅籌商

辦也將此由五百里各密諭知之○諭左宗棠穆圖善奏附省東

西兩路官兵迎剿賊匪疊獲勝仗一摺陝甘回匪疊次乘虛竄擾



藉圖搶掠經協領薩英阿等先後在酸子溝平城堡楊家莊等處  
截剿獲勝斃匪多名時秦州轉解甘軍餉銀尙未到省金積堡復  
有竄來陝賊肆行殺掠經善山保等督隊迎擊殲除殆盡將餉銀  
迎護到省並將沿途竄賊伏賊悉數斬擒剿辦尙爲得手惟此次  
賊匪雖經各路官軍疊次殲除難保不再乘虛撲犯著左宗棠穆  
圖善飭令各路統將加意嚴防毋稍疏懈將此由五百里各諭令  
知之○庚寅諭內閣左宗棠奏收撫回眾見籌安插等語陝甘回  
匪煽亂以來屢經官軍剿辦殲戮甚多朝廷軫念民生屢諭統兵  
大臣但分良莠不分漢回原以回民同係食毛踐土之人豈無天  
良其中被逼勉從不能自拔者自必不少大兵所至期於除暴安  
良斷無概行誅戮之理據左宗棠奏稱該回眾等久處賊巢旣苦  
頭目之侵陵迫脅甫離巢穴又畏漢民之報復尋仇因之依違其

聞以求苟免此等情形實所不免該督見擬劃出荒絕地畝稍成  
片段者將收撫之陝回給以籽糧課其耕作辦理甚爲妥協著卽  
督飭該地方官悉心經理彈壓撫綏俾得各安生業其甘回中如  
有真心悔罪自拔來歸者亦卽妥籌安插並著剴切曉諭漢回居  
民務各永泯猜嫌同登衽席用示朝廷覆幬無私至意○諭軍機  
大臣等前據曾國藩奏王三屢經翻供見已釋還本日據給事中  
胡毓筠奏請將武蘭珍王三解京會訊以釋羣疑等語前羅淑亞  
來京告知總理各國事務衙門王三並無其所獲之犯的係王  
二並稱武蘭珍到案並未受刑其意疑係有串供誣扳等情嗣據  
崇厚面奏所獲王三係王二與武蘭珍所指之人籍貫面貌亦不  
相符該給事中所請解京會訊自無庸議惟王三卽係王二一層  
該督並未具奏著曾國藩毛昶熙查明實在情形具奏至武蘭珍

爲此案罪魁該督等是否審訊明確將來如何定擬並著一併奏聞至緝拏正兇一節著曾國藩等懷遵昨日諭旨嚴拏務獲迅速籌辦原摺均著鈔給閱看○左宗棠奏靈州諸回巢穴以金積吳忠兩堡爲最著實則自靈州城迤西數十里秦漢兩渠閒堡寨共四百有奇近吳忠者呼爲吳忠近金積者呼爲金積垣厚塹深樓堞相望非止兩堡也除官軍前後攻破堡寨百數十所外逆回畏勦紛竄有棄堡寨歸併各大堡者有棄堡寨歸併馬化澂所踞各堡者所遺各廢堡官軍擇其地居衝要者據之不當衝要者毀之統計金積吳忠各堡寨尙爲賊踞者不過三十餘所而已馬化澂父子反首逆穆生花屢次乞撫不得遂嚇老弱回民赴劉錦棠金運昌軍前乞就板橋琴橋吳忠一帶廢堡暫架棚廠居住以便耕作計官軍憐而許之爲漸圖復踞張本劉錦棠黃萬友會商姑漫

應之五月十八日靈州中路首逆王洪又請修秦渠之隄放水蔭田劉錦棠知其意在奪下橋永甯洞十九日回民百餘試來修隄劉錦棠金運昌飭官軍勿動二十日五鼓率隊分三支一伏永甯洞一伏下橋一伏渠北伺之候至巳初王洪楊明王忠等果糾靈州四門三路及胡家堡大小回目帶壯丁數百名齊來修隄比抵永甯洞下橋中間伏兵突起生擒王洪及逆回二百餘名斬之餘悉殲除無一脫者訊據獲賊金海鼃供稱犯本四川勇丁投入賊營多年王洪派充保全營百長此次王洪畱兄王鵬守寨所有大頭目楊明王忠僞參領楊添默白珠強馬學吉楊天瀧楊洸友僞先鋒王芳馬英楊珠秀僞百長楊天海王十倫王序玉馬文英楊自喜馬仲楊友郭其海黃添順趙裕年金元馬佐朝等誤以官軍中計圖趁此奪回永甯洞下橋與板橋琴橋各廢堡及棗園堡聯

絡一氣便將官軍截爲兩段不料翻中官軍計中訊畢斬之察看波浪湖水勢甚漲甯洞既經官軍堵塞吳忠堡以南一片汪洋馬八條馬七兩堅寨牆根均被積水浸透劉錦棠金運昌會商乘漲攻之二十一夜三更劉錦棠率隊梟水攻馬八條寨金運昌率隊梟水攻馬七寨五鼓克之計共斃賊七百餘名生擒四十餘名據生擒賊供馬七馬八條均馬化澂之弟四月初旬已逃入金積此股係陝回馬生彥之夥黨上年馬生彥竄河州此股經官軍截斷折回金積堡向馬化澂乞糧馬化澂給糧每人日三合派守兩寨至是寨破悉被擒斬王洪楊明兩逆伏誅餘黨猶踞堡寨招陝回之乏食者助其拒守而中路胡家堡洋麻湖海子墩大沙井一帶所種之麥穗徧野計十日內外可以收割劉錦棠料賊不待麥熟卽將搶收以圖少延喘息六月初七日約金運昌馬步各隊沿

秦渠向楊明各寨進發黎明行抵該處見各寨牲畜正出巢放草  
比飭記名提督余虎恩記名副都統雙壽副將郭宗儀率馬隊記  
名提督周雲祥譚上連率所部步隊橫出截之奪牲畜六七十頭  
立斃逆回數十名餘賊仍縮入堡內劉錦棠飭各營頓旗勿動縱  
勇丁長夫併力割麥午後收隊回營初八日五鼓各營仍出隊割  
中路之麥行抵王洪寨寨中步賊數百名騎賊百餘名倚寨排列  
以拒官軍回眾競出東門割麥官軍頓旗勿動俟其收割漸多仍  
令余虎恩雙壽率馬隊衝殺東門外之賊盡掠所獲捆載而返是  
夜劉錦棠與金運昌雙壽會商進攻靈州西十里海子墩杜家寨  
初九日黎明行抵該處賊已憑牆列隊矣劉錦棠飭提督羅照升  
譚拔萃曾松明李雲貴四路逼攻提督周國勝尹興茂王秀根等  
七營列隊左右雙壽馬隊張兩翼以待官軍填壕架梯肉薄齊登

賊輒石紛下前者帶傷後者繼至力攻時許南面賊始稍卻官軍  
猱騰而上立將杜家寨攻拔斬逆目杜舉及逆回五百餘名毀其  
堡而還旋掣隊向中路行至王洪寨南縱勇丁割麥一面調靈州  
城內難民千餘隨同收割仍收隊回吳忠堡是役弁勇陣亡者八  
名受傷者六十七名初十日五鼓出隊收割胡家堡一帶之麥雙  
壽余虎恩領所部馬隊先沿秦渠而下天明見堡內各回已出卡  
門散市麥地馬隊縱橫衝殺斃賊二百餘名步軍踵至連破堡西  
南二卡斬逆目馬濠及逆眾二百餘名生擒七名舉火焚卡仍分  
隊收麥而還是役也弁勇陣亡者六名受傷者十九名十二日劉  
錦棠率所部與金運昌雙壽馬步隊攻王紅連寨察看寨外禮拜  
寺頂高與寨牆齊劉錦棠飭提督譚拔萃李雲貴軍功張俊於寺  
頂累土輒爲牆調槍礮手開槍向寨內轟擊飭提督朱德開軍功

董福祥李雙良攻寨西北以分賊勢飭提督王承續尹興茂王秀  
棣周雲祥余虎恩潘鳳翔譚上連郭宗儀等會同雙壽遏中路賊  
援布置已定中軍鼓聲起各營肉薄寨柵賊憑牆拒守槍礮如雨  
官軍冒險拔寨填壕火器環施一面積薪焚燒寨門一面掘牆豎  
梯寨上木石紛下雜以火彈踰時弁勇帶傷者已數十名梯仍未  
豎劉錦棠飭寺頂各將士向寨內連環施放槍礮並親督將士用  
長矛推倒牆上累砌甃堞寬約二丈許譚拔萃率壯士連豎三梯  
猱騰而上牆上短刃相接帶傷墜而復上者六七次寨內賊倒傾  
煮熟麥湯鍋盔齊下軍功張俊瞰由賊少處捲旗躍上各營將士  
鼓勇齊登揮刀砍諸悍賊餘均拋械紛遁官軍奮威壓勦首逆王  
紅連伏誅餘匪一千二百餘悉數殲旃遂踏平王紅連大寨是役  
員弁勇丁陣亡三十七名受傷者一百七十四名蓋攻堅之難也



十三日出隊抵下十子河劉錦棠登高瞭見中路胡家堡海子墩大沙井洋麻湖各回寨紛紛遷徙有向漢伯堡入金積堡者有向王洪楊明大寨竄走者比商同金運昌率所部馬隊分左右中三路截擊由胡家堡至王洪大寨斬獲甚多劉錦棠鳴金收隊稍憩片時鼓聲起復齊隊分途攻殺攻破王洪大寨外卡搜燒各廢堡所獲積麥而還是役計共斃陝甘逆回千數百名劉錦棠黃萬友以中路麥禾收畢知官軍會勦金積啟行有期擬將中路一帶所種糜粟高粱青苗一併割刈以絕賊糧十七日出隊洋麻湖正刈苗閒忽見余虎恩馳報正南傍山一帶賊隊紛出劉錦棠立飭各營飛馬截勦比抵大山觜斃殿後之賊約三百有奇生擒四十五名而賊之前隊已竄匿郭家寨據生擒賊供此起均係陝回並無頭目因乏糧已久圖由郭家寨入山繞出橫城渡河買糧訊畢斬

之郭家寨在吳忠堡正南金積堡東南近時金積逆回赴河西通  
昌通貴兩堡取糧恆繞道於此十八日劉錦棠金運昌各率所部  
馬步分三路攻郭家寨行抵寨前飭各營列隊猛攻寨外木柵已  
拔盡矣賊猶憑牆穩抗逾時不下劉錦棠周覽地勢見寨北兩三  
丈地有舊牆一堵劣堪藏身遂令搬運土輒接砌橫牆使軍士於  
牆內向寨施放火器仍令各隊緊攻東西南三面以分賊勢劉錦  
棠金運昌潛派隊伍乘閒下北面濠溝齊掘牆根良久牆土坍塌  
五丈許各營奮迅衝入遇賊卽砍寨首郭慎之投井溺斃寨賊八  
百餘悉數殲之官軍陣亡十餘名受傷者五十餘名十九日會攻  
王洪寨寨賊固匿不出各軍施放開花礮子百餘顆人聲鼎沸而  
守垛諸賊仍植立如故官軍以六成隊割刈青苗而還二十日仍  
向中路出隊行近王洪寨忽見寨東人畜散漫爲數頗多余虎恩

雙壽熊有常周雲祥譚上連郭宗儀等縱馬衝突賊悉竄匿廢堡中凭牆抗拒劉錦棠知各堡本艾退棄故址房屋均毀牆垣亦多坍塌賊不能踞也遂商金運昌揮隊圍之圍甫合賊併力齊衝各軍縱橫盪決霎時屍橫遍野斃賊六百餘名生擒三十一名據生賊供此起爲陝回首逆余彥祿之黨回目是楊幅因乏糧謀赴草地掠食不意猝遇官軍截殺楊幅及此起回眾盡斃矣是役官軍陣亡者四名受傷者二十五名二十一日劉錦棠金運昌會攻吳忠堡北稍東八里大溝之馬宏寨破之斬寨首馬宏及餘賊三百有奇毀其堡而還二十二日出隊胡家堡以四成隊攻堡六成隊收割青苗開花礮子轟入寨中者數十賊雖驚亂困守如故二十三日出隊大沙井一帶收割青苗傍晚收隊其由固原一路進攻金積堡以馬家河灣爲總要以韋州堡爲閒道臣飭諸軍北進會

攻金積必先清馬家河灣以保運道必先扼鞏州堡以扼賊衝馬家河灣一帶回民管事頭目軍功監生馬忠海性本兇狡從前曾受馬化澂誠正王偽封自就撫以來陽順陰逆屢煽黨眾劫掠糧運軍裝餉銀嫁名陝回並藏匿河州逆回海澂李山珍等與馬化澂潛相勾結半角城防軍提督周紹濂詞其奸狀以告臣密飭周紹濂誘馬忠海赴平涼飛令參將馮桂增潛率所部馬步三營徑擣韓家水巢穴六月初五日臣提訊馬忠海窮詰奸謀狡不承認徐出該逆所擄鎮原民女王桂花兒等質之仍逞辯不已適馮桂增報稱六月初一日申刻馳抵韓家水布隊圍下中上東南西南五堡乘賊無備立將賊巢次第攻破生擒黨惡回目馬繼曾馬中虎金萬國金點爲馬勝長趙守法楊文光馬存先馬宗玉楊志元丁國英等十一名並河州逆回海澂一名五堡逆回二百餘名訊

實概予斬決搜出疊次搶劫軍裝帳房數百件據錄送馬存先供詞馬忠海疊次劫掠戕害弁勇行人及與金積河州陝西各回逆交通情事一一確鑿並搜出逆信各件臣比嚴訊馬忠海無可狡賴當將該逆殛死傳首固原南北各處示眾續據馮桂增會同副將桂錫楨攻破馬忠海所管三埠夙沙及長流水各賊巢擒斬數十名餘賊悉遁其韋州堡管事回目蘇兆明本金積逆黨綽號小光棍曾受元帥僞職其姪蘇文榮亦號二元帥上年劉松山進兵時於近花馬池地方途遇韋州行劫阿拉善旗歸巢逆回擒斬數百名訊生賊供知爲蘇兆明所惑旋因官軍進剿道出韋州蘇兆明乞撫因釋未誅嗣察蘇兆明仍持兩端凡由金積堡出竄之陝甘各回往返皆由韋州經過蘇兆明高畱屯紮供給資糧良回馬柏森以該逆蓄謀叵測爲言臣於中路進兵時先飭提督丁賢發

率所部三營由半角城進扼韋州令就便掩捕適探金積賊騎三百匿於該處堡中丁賢發奉檄卽行六月二十三日師抵韋州賊已聞風先遁丁賢發駐營堡外自帶親兵百人入駐堡中示賊不疑因密察逆黨蹤迹佯與約期議事七月初二日蘇兆明蘇文榮蘇聿阿渾海滿德僞百長蘇隆揚蘇漢馬正德金玉美何生雲王有泗蘇三甘昌畢集丁賢發數其受撫後交通馬化澂及陝回馬正和崔三甘回謝四之罪斬之一面出示安撫回民令各安堵無恐積年之患已除通計自靈州迤西抵金積所有堡寨四百數十餘所疊經攻破平毀外僅存十一堡其自金積迤西各堡寨則隨地異名不如金積吳忠之稠密應由中路攻剿於勢方順馬家河灣韋州堡爲金積南路關鍵兩處旣得中路諸軍更可一意進取臣已檄黃鼎會同雷正綰總統中路諸軍與劉錦棠金運昌約

期攻勦大約中路先奪峽口要津則全局在握自當慎以圖之又奏據周開錫稟稱陝回及河狄各回殘黨自四月內負創歸巢比檄各軍乘勝進取該逆偵知復糾黨出渭源而南紛擾鞏秦各境蓋圖牽綴官軍也周開錫飭記名提督涼州鎮總兵傅先宗由鞏昌前進飭河州鎮總兵王得勝提督彭忠國梅開泰道員湯聘珍所部繼之飭湯聘珍各營畱守鞏昌飭提督楊世俊總兵田連考等由秦州出伏羌防賊蹤繞出鞏昌後路比傅先宗進至丁家門賊眾已蔓及汪家衙王家河燒石灰溝矣五月初二日傅先宗令總兵蘇家良副將趙得禮率所部馬隊出王家溝口覘賊遇賊百餘敗之大股步賊忽蟻擁而至勢殊驕甚傅先宗整隊迎敵王得勝彭忠國率所部沿丁家門溝內蛇行出賊後拊其背兩路鈔擊賊眾大潰刺斃轟斃墜斃者七八百名初四日賊越燒石灰溝趨

新寺鎮王得勝彭忠國移軍王家河斷賊歸路傅先宗直指新寺  
遇賊下川地方令四品銜守備何建威率所部精銳五營奮威衝  
殺自督所部步隊居後相機策應令馬隊斜出賊陣左右槍礮環  
轟提督丁桂智總兵王銘忠副將王應順躍馬貫陣賊敗退山腰  
復憑高反鬪傅先宗督總兵魏紹珍副將朱運廣參將李枝宏等  
一鼓衝上馬隊分由山徑併力鈔截賊四顧皆官兵奪路狂竄各  
營躡追二十餘里迫墜崖塹而斃者以數百計餘逆越嶺南遁兩  
戰計共斃賊一千八九百名生擒賊目麻耀庭等一百三十七名  
弁勇陣亡者八名受傷者三十七名提督楊世俊總兵田連考馬  
步由秦州出伏羌本爲鞏昌策應之兵初七日賊踰甯遠界竄伏  
羌西南八十里之禮辛鎮初八日楊世俊率所部馳抵禮辛賊又  
已竄甯遠屬之樂善鎮柏家山大石頭廖家莊等處楊世俊分途



追之初十日辰刻始與賊遇賊列隊分拒官軍槍礮矛刺斃悍賊十數名賊且卻且前提督張仲春總兵裴思朝遊擊馬有才率各旗馬隊併力衝壓直至謝家莊大草川斬馘二百餘名生擒三十餘名賊眾敗竄甯遠屬之余家坊杆大馬蹄大寶背楊家河一帶十五日楊世俊商同提督李奉清田連考選銳卒分途搜剿自率馬隊出李家溝門賊瞥見官軍旗幟復向禮縣屬之馬塢狂奔適李奉清隊伍自大馬蹄追出與楊世俊田連考之兵合擊賊於草塘河緊躡至岷州東北界之狼渡灘呂徑河沿途斬悍賊數十名賊棄糧畜輜重復向鹽關遁去適周開錫所派宗岳軍副將管春林等先至鹽關據險以待十七日賊至管春林等急起截之殲賊數百官軍弁勇亦微有傷亡據逆目馬轄比馬生兒等供河回馬俊馬耀廷馬六十及叛附狄河之鞏昌逆回馬一麻張二司務鹽

關逆回馬元等六七千眾分爲大小四股本圖由鞏昌甯遠禮縣走徽成擾甘南腹地牽綴官軍崔三馬尨大師等約隨後踵至不意連受痛創馬俊馬耀廷初四斃於甯遠下川馬元墜崖不知下落初十日馬一麻又斃於陣餘賊疊經官軍擊散冒死西遁不復成股自此伏羌甯遠隴西禮縣地方一律肅清傅先宗遂合王得勝彭忠國何建威馬步二十二營折轉鞏昌鼓行而西兵抵首陽城調逆眾千餘踞渭源城陝回與狄河各回正因爭糧私鬪聞官軍至惶懼思竄十九日傅先宗等馬步收復渭源縣城乘勝奪一桿旗之險就地築壘一桿旗地方距渭源十五里距狄道百里形勢險要爲西南一大關鍵周開錫比令梅開泰分營扼之檄傅先宗率諸軍一意進攻自督楊世俊田連考之兵進鞏昌以備策應飭宗岳六營仍駐秦州六月初二日傅先宗等整齊隊伍趨慶平

踰窯店前行四五里遇伏賊數百擊之擒斬多名初二日傅先宗  
王得勝何建威彭忠國等分三路進遇賊首六阿渾禹得彥等憤  
戰之賊數千大戰於狄東三十里堡斬悍賊數百名生擒二十餘  
名沿途賊卡悉數平毀初三日各軍敗賊於狄城三里乘勝直薄  
城下王得勝帶隊衝入北門傅先宗帶隊衝入東門巷戰逾時賊  
由西門狂竄越洮河而西官軍蹙之河邊刺斃溺斃無數牟佛諦  
守堡之賊數百見官軍已拔狄道州城震駭之餘開門乞撫傅先  
宗等揮兵亟進賊敗入堡中官軍蹙之立復牟佛諦堅堡餘賊鼻  
水逃竄竊維甘肅各軍乘崔禹李米諸逆竄陝敗歸截剿疊勝復  
乘勝長驅連復渭源狄道城池平諸卡寨機勢尙爲迅利牟佛諦  
卽陝回馬榮別名所踞北莊在狄道州城東南三里樓堞高聳崇  
墉屹立前此雖克州城而北莊未能攻拔致爲厲階此次一攻卽

下固非始願所及也以局勢論之宜長驅並進規復河州惟自秦州迤西而鞏昌而狄道四百餘里中間渭源屬境二百餘里彌望蒿萊人煙斷絕大軍前進後路須節節設防以護通道防兵多則進剿之兵少察看河州賊勢未可虛弦下之非俟北路甯靈肅清由蘭州出兵難期得手論兵勢須防後路通饟運論賊情須斷句結取遠勢未可重剿輕防致有疏失 上諭甘肅南路官軍克復渭源狄道城池並攻拔牟佛諦堅堡正可乘此聲勢進規河州左宗棠等以自秦州至狄道計程四百餘里中隔渭源等處一片荒蕪必須節節設防保護通道方能前進察看河州賊勢應俟甯靈肅清由蘭州出兵方能得手固係持重之見見在北路各軍已將靈州一帶賊寨攻破多處軍務自有起色則進剿河州之兵此時卽當妥爲部署著左宗棠穆圖善悉心商酌以期迅掃賊氛靈州

迤西至金積堡僅存賊堡十一處王楊等逆伏誅賊眾無糧可據勢已窮蹙著左宗棠飭令劉錦棠等迅將胡家堡等處攻拔盡殲醜類中路官軍疊克馬家河灣鞏州堡等處金積堡南路關鍵已爲我得左宗棠務當檄飭黃鼎會同雷正綰總統中路諸軍先將峽口要隘奪回次第剿平金積迤西各堡寨並與劉錦棠等約期會剿迅克金積等堅巢以振全局毋稍鬆懈前有旨令李鴻章督兵馳赴近畿業據該督奏報起程並據奏稱北山土匪潰勇巨股已殲餘匪不至爲患已咨商蔣志章酌派三五營分紮要隘等語北山事甫就緒李鴻章近已離陝左宗棠仍當妥籌兼顧毋令甘回折竄陝疆又致句結爲患左宗棠另片奏請將敖天印暫准畱營等語敖天印在南路帶兵既尙得力一時乏員接帶著准其暫行畱營效力該大臣卽咨行李鶴年查照可也將此由六百里各

諭令知之○左宗棠奏辦回之道與辦髮逆捻逆不同髮逆薙髮  
捻逆拋棄馬械卽與平民無殊故戰勝受撫給以免死牌票資遣  
歸家如其措置得宜便可相安無事其無家可歸及悍鷙不馴者  
或暫羈之營中鈐以軍令編管既密久亦相忘解散之策行則賊  
勢孤安插之地多則賊羣渙此辦髮逆捻逆必由之道也回則不  
然其與漢民積仇既深婚姻不同氣類各別彼此相見輒起殺機  
斷難孚洽又種族攸分狀貌亦異雜一回民於稠眾中令土人徧  
識必能認別百不一爽回民中豈絕無稍知順逆亟思自拔來歸  
者然久處賊巢旣苦頭目之侵陵迫脅甫離巢穴又畏漢民之報  
復尋仇當死生莫卜之時靡不依違其間以求苟免此解散之難  
也以陝回人數計之從前無事時散處各州縣地方丁口奚啻數  
十萬見計除西安城中土著兩三萬外餘則盡族而行陝西別無

花門遺種卽合金積河狄西甯涼州等處見贖陝回計之丁口亦不過數萬其死於兵戈疾疫飢餓者蓋十之九實回族千數百年未有浩劫區區遺種旣無歸陝之望就甘地安插而甘民痛定思痛又不免他族逼處之虞此安插之難也疊奉諭旨不論漢回祇論良莠仁育義正之懷昭然若揭回民亦具人心豈獨毫不知感恩如仇衅四結每苦無處求生莫知禍之所屆臣維解散安撫實辦回不可少之著因於經理屯墾之餘劃出荒絕地畝稍成片段者以處求撫之陝回見在平涼大岔溝等處收撫陝回老弱婦女及務農丁壯約數千人均給以賑糧籽種課其耕種與賑撫各屬災黎招輯屯墾一律辦理以廣 皇仁又奏洮州岷州毗連河狄逼近賊巢均須重兵防勦周開錫原派扼防岷州之總兵范銘一軍本分駐秀石關酒店子木寨嶺等處五月初四日丁家門新寺

鎮竄賊經傅先宗各軍擊敗之後零股由喇嘛口竄酒店子繞木  
寨嶺之後范銘誦賊信整隊迎擊分馬步從閒道包鈔初六日鄧  
桂舟陸喜福所部遇賊於木寨嶺殺斃百餘名迫而淹諸洮河者  
數十名生擒十二名騎賊五六百奔業木城包舍口竄攢都溝初  
七日趙順陶達德隊伍攔截之鏖戰兩時陣斬八九十名生擒二  
名敗賊遁秀石關覓歸路范銘復揮徐成霖各營循三岔東山鐵  
鼓溝躡賊初八九日出大車廠接斬而西連日斃賊二百數十名  
生擒河州賊目阿洪議布訥隨身搜獲洋槍四桿弁勇帶傷十六  
名餘賊受創歸巢復噉悍黨犯洮州嘯聚衆麻時周開錫正派副  
將張廷秀洮州土司楊元設卡於大草灘遏賊南竄十九日偵賊  
至比卽知會署洮州同知張家相護理洮岷協副將遊擊丁永安  
加派守備楊宗秀把總高世佐經制許發得等率領番漢兵團密



布要隘賊至伏發殺斃百餘名追至綫家灘敗賊西竄兵團陣亡  
八名受傷八名報聞○予甘肅陣亡副將汪有餘祭葬世職並道  
員恆齡建祠○壬辰諭吳棠撫恤川東被水災民○癸巳諭軍機  
大臣等前據蘇鳳文等奏叛匪梁添錫遁入越南安邊地方當經  
諭令蘇鳳文馮子材飭令前敵各軍迅速進攻肅清邊境迄今已  
逾多日尙未據蘇鳳文等續有奏報不知見在剿辦情形究竟如  
何總當督飭各軍乘勝進剿迅殲醜類以靖邊陲安南國沿邊膏  
腴如胥江等處在安南爲三省地方其廣不過中國一郡該國謂  
之東京近年間爲法國所占踞有駐紮重兵並設提督等官情事  
安南陸路接壤廣西由廣西邊界至胥江道里若干有無山川阻  
隔著蘇鳳文密派幹練有識之員前往該處確訪一切情形繪圖  
貼說並將近日安南與法國情意是否融洽之處據實奏聞想該

撫必能仰體此意慎密籌辦也○甲午諭何璟籌解西征軍餉○是月豁免山東東平州道光年間民欠攤徵隄工銀湖南晃州廳被撥上年額賦蠲緩兩浙浦東等四場歉收上年竈課

八月丙申諭軍機大臣等昨據曾國藩等奏提解已革天津府縣到津一摺本日據總理各國事務衙門奏近日辯論情形並鈔錄照會呈覽一摺張光藻劉傑以奉旨治罪人員理應在津聽候查辦乃一往順德就醫一往密雲安置眷累遷延多日屢經嚴旨催促始赴天津以致洋人枝節叢生任已私而貽誤國事賢能之吏豈應如此見在羅淑亞所遞洋文業由該衙門譯出卽著曾國藩等按照所指各節逐一詳訊取據切實親供其事所必無者固應明白剖晰其情所或有者亦不可諱飾避就庶有以折服洋人之心不至再滋口實至緝獲正兇實爲此案最要關鍵曾國藩等務

當督飭地方文武員弁認真購緝將在逃首要各犯儘數弋獲訊明懲辦其見獲各犯亦著詳細研究務得實供毋任狡展成林到津後毛昶熙計已交卸仍著暫畱天津會同曾國藩籌辦一切丁日昌於洋務情形素稱熟悉此次兼程到津籌畫各事均極認真卽著幫同曾國藩等悉心妥辦務協機宜以副委任洋文內有牽涉陳國瑞之語並著曾國藩等詳查確訪據實奏聞總理各國事務衙門摺並羅淑亞照會二件及照覆一件譯出洋文一件均著鈔給閱看將此由五百里各密諭知之○丁酉諭內閣魁玉奏總督猝被行刺因傷出缺一摺據稱兩江總督馬新貽於七月二十六日赴署右箭道校閱事竣回署突遇兇犯刺傷脅肋當經隨從武弁等將該犯卽時拏獲嚴訊僅據供稱係河南人名張汶詳而行刺緣由供詞閃爍該督受傷甚重延至次日身故等語覽奏不

勝駭異總督衙署重地竟有兇犯膽敢持刀行刺實屬情同叛逆  
亟須嚴行訊究卽著魁玉督同司道各官趕緊嚴訊務得確情盡  
法懲辦馬新貽持躬清慎辦事公勤由進士卽用知縣歷任繁劇  
咸豐年間隨營勦賊屢克堅城自簡任兩江總督於地方一切事  
宜辦理均臻妥協方冀長承恩眷倚畀優隆茲因被刺遇害披覽  
遺章實深悼惜馬新貽著賞加太子太保銜照總督例賜卹並入  
祀賢良祠任內一切處分悉予開復伊子馬毓楨著加恩賞給主  
事分部行走該督靈柩回籍時著沿途地方官妥爲照料應得卹  
典該衙門察例具奏用示憫念疆臣至意尋予祭葬諡端敏○諭  
軍機大臣等本日魁玉馳奏督臣被刺因傷出缺一摺兇犯張汝  
詳膽敢伺隙行刺戕殺總督重臣實屬罪大惡極必應研訊確情  
從嚴懲辦以申國法著魁玉督飭司道各官設法熬審將因何行

刺綠山及有無主使情事一一審出據實奏聞見在長江防範事宜最關緊要本日據英翰奏江面扼要以靖江江陰之閒爲第一門戶其次則焦山兩岸亦爲險要馬新貽已邀黃翼升東下面商機宜並因下游兵船不敷分布須合上游數省全力方可備豫萬全等語與昨日寄馬新貽諭旨適相脗合魁玉見署督篆責無旁貸卽著隨時咨商李瀚章英翰劉坤一郭柏蔭同心協力迅速妥籌湖北江西兩省何處可以助兵何處可以助餉想李瀚章郭柏蔭劉坤一素顧大局必能不分畛域悉心區畫也黃翼升見在行抵何處所有整頓水師籌辦江防之處著與各該督撫等嚴密圖維以資備禦將此由五百里各密諭知之○諭英翰奏報提督自皖起程日期一摺提督劉銘傳久經戰陣忠勇過人茲經英翰遵諭令其北來該提督卽於上月二十九日由六安起程循淮下駛

取道山東赴直是其報國之忱久蘊於中間召卽行尤非諸將所  
及覽奏之下嘉慰實深前據曾國藩奏銘軍係百戰之兵但駐防  
過久恐於戰事稍疏若令劉銘傳親出統馭不難頓復舊觀等語  
該軍見紮滄州靜海一帶卽著曾國藩傳知該提督馳赴該營督  
飭所部將士勤加訓練俾此軍悉成勁旅以備折衝朝廷必假該  
提督以事權用展其才如無須用武屆時當令李鴻章傳諭該提  
督來京陛見本日發去白玉搬指一箇白玉翎管一支火鏹一把  
大荷包一對小荷包兩箇著曾國藩交劉銘傳祇領以示褒獎正  
在寄諭間據魁玉奏稱兩江總督馬新貽猝被行刺因傷出缺已  
將曾國藩調任兩江總督直隸總督著李鴻章補授矣兩江職任  
綦重曾國藩前在江南多年情形既多熟悉布置尤爲得宜刻下  
交卸在卽務當遵奉昨日諭旨嚴飭地方文武員弁將在逃首要

各犯儘數購獲並會同毛昶熙丁日昌成林將見獲各犯詳細研  
究務得實供其羅淑亞照會內所指各節該督等亦當逐一詳訊  
取具張光藻劉傑切實親供以期及早結案李鴻章見在行抵何  
處著卽馳赴天津接篆所部各軍仍著分飭郭松林等於直隸邊  
境獲鹿一帶河北彰德山西平定等地方分紮正定一帶近聞有  
游勇滋鬧洋人教堂情事著曾國藩李鴻章檄飭各營將領就近  
彈壓兵民毋得從中搆釁儻有假冒該營勇丁及別處游勇藉端  
生事者並著隨時訪拏懲辦綏靖畿疆將此由五百里諭令知之  
○以湖北荊州各府屬被水諭李瀚章等妥籌賑撫○調曾國藩  
爲兩江總督未到任前以江甯將軍魁玉兼署調李鴻章爲直隸  
總督以李瀚章爲湖廣總督楊昌濬爲浙江巡撫由布政使遷○戊戌  
諭軍機大臣等張廷岳等奏確探賊蹤見籌辦理情形一摺本年

夏閒賊匪先後焚掠額爾德呢班第達呼圖克圖遊牧暨沙拉噶勒卓持台各該處被擾情形業經張廷岳等派員前往查明卽當設法分別撫恤俾該蒙民喇嘛等復安生業毋令失所張廷岳等以賊有九十月閒復來竄擾之說庫倫地廣人稀無險可扼必須斷其來路方免伺隙奔突請飭甯夏綏遠盤查奸宄所籌亦是著定安金順豐紳謙禧在於毗連口外關津要隘設兵盤詰遇有詐稱商民結隊馱載並無部票形迹可疑者立即認真搜查免致賊匪潛蹤出口滋生事端惟須將派出兵弁嚴加約束不得藉端騷擾累及商民張廷岳請令綏遠派兵出口於賽因諾顏扎薩克圖汗兩部落西南一帶搜剿賊巢見在該處有無賊蹤是否須用兵力搜捕著福濟酌度情形會商定安辦理張廷岳等另片奏春閒西愛曼有警俄國領事卽調到該國馬隊百名在庫倫晨夕操演



等語此項馬隊雖不滋事而亦不可不防著張廷岳等畱心查察毋稍大意將此由五百里諭知定安金順福濟豐紳張廷岳阿爾塔什達並傳諭謙禧知之○諭崇實吳棠奏裁汰援黔兵丁並通籌全局辦理一摺據稱川軍自援黔以來閱時三載增兵增餉民力難支見在貴州驛路已通荒土重開釐金自有起色而川東之重慶夔州等屬均被水災餉事實難支持已飭唐炯先將贏卒疲兵大加裁汰並籌全局從長辦理等語黔省軍務自川楚各軍協剿後清江北岸業已肅清正宜乘勝進攻台拱將南岸各苗寨次第蕩平若遽行鬆勁必致賊勢復張全功盡棄崇實等以天氣暑熱士卒多病不能不暫爲休息見交秋令正可及時進剿著崇實吳棠飭令唐炯斟酌情形裁汰疲弱督率精銳迅速會合席寶田等軍合力進剿一面咨會曾璧光派撥黔省兵勇協同防剿不可

久事遷延將此由五百里各諭令知之○允定安奏添設黃河水師○予貴州陣亡總兵官姚華萃祭葬世職建祠○飭山西撥銀四萬兩解綏遠城備軍餉○調盧定勳爲浙江布政使以錢鼎銘爲直隸布政使調范梁爲直隸按察使以李慶朝爲山西按察使

由河東道遷

○己亥諭各直省嚴拏滋事勇丁○諭英桂等布置海防

○予浙江陣亡遊擊江九華祭葬世職附祀陳紹祠○庚子諭軍機大臣等蔣志章奏北山各軍剿賊疊勝並龍錫慶一軍剿平匪壘暨調張福齊馳紮郿宜各一摺韓城火燒溝等處匪勇滋擾經總兵張佑庭督軍前進並提督李光前派李家安等會剿獲勝宜川延川延長一帶匪勇又經喻步蓮等率軍擊敗龍錫慶一軍於涼水灣得勝後卽飭劉春藻帶隊由瓦窯堡逼攻老巢疊斬賊目多名平其堅壘劉春藻復統軍進擣逆匪李凡覺勢窮乞撫龍錫

慶因該逆狡悍異常當於軍前正法全股見已蕩平所有龍錫慶李光前等軍剿賊尙屬奮勉著准其擇尤酌保毋許冒濫北山徑隘叢雜匪勇跽伏甚多亟應乘勝接捕蔣志章以周盛傳拔隊渡黃調張福齊六營由白水開駐鄜州以三營填紮張村黑水一帶以三營會同喻步蓮等於延宜一帶勤加搜捕並派胡得成馳赴韓城邵陽等處擇要扼紮卽著嚴飭該總兵等認真堵禦與在防各軍聯絡聲援遇賊卽擊不准稍有疏虞據該撫奏左宗棠函稱黃鼎等軍已攻破張恩堡見督軍進規峽口著該大臣卽飭該道員激勵諸軍奪取該處要隘以期次第進攻埽除羣醜至陝省籌辦撫綏招徠賑墾各事宜並著左宗棠蔣志章督同司道遴選廉能收令實力奉行毋得有名無實將此由四百里各諭令知之○予陝西陣亡遊擊喻緒良祭葬世職○辛丑諭軍機大臣等李鴻

章奏行抵直境派兵分紮晉豫邊界一摺據稱郭松林全軍暫紮彰德衛輝等處周盛傳馬步各隊見在平陽洪洞等處休養操練該督自率親軍入營行抵井陘擬卽赴獲鹿暫紮籌辦糧運惟各軍遠紮晉豫邊界所慮一旦有警呼應不及等語所籌均合機宜前已有旨將李鴻章調補直隸總督諭令赴津接篆該督見已行抵直境卽著懷遵前旨迅速前往天津接受督篆妥籌一切以副委任近日洋人情形尙不至遽行決裂所有郭松林周盛傳等軍卽著照該督分派地方暫行駐紮以休兵力仍當嚴飭該統領等隨時操演嚴加約束毋令滋生事端將此由四百里諭令知之○諭庫克吉等撫恤熱河被水災民○壬寅諭軍機大臣等魁玉奏近日省城情形並續獲應訊各犯一摺馬新貽出缺後前已有旨令該將軍將見獲之兇犯張汶詳嚴訊確情茲據奏稱該犯供詞

尙屬支離並拏容畱張汶詳之朱定齋周廣彩及同時在道旁之王咸鎮等隔別審訊等語此案馬新貽以兼圻重臣猝被兇犯行刺情節重大亟應嚴加根究仍著魁玉督飭承審各員將兇犯張汶詳及朱定齋等分別熬審務將行刺緣由究出不得含混奏結此外標弁家丁亦應隔別詳訊如有供出兇黨一併嚴拏究辦以儆兇頑該省近日情形據稱見屆鄉試稽察尙嚴惟省城士子雲集華洋並處最易滋生事端並著該將軍嚴飭地方文武認真稽察隨時彈壓毋得稍涉疏虞將此諭令知之○癸卯諭軍機大臣等李鴻章奏郭松林等軍分別駐紮並擬率親軍先至保定再行赴津等語該督於抵保定後趕緊料理一切卽行前赴天津妥籌辦理正定靜謐如常雖據該督查明兵民與教堂毫無干涉仍著李鴻章督飭各將領隨時彈壓毋令滋生事端至各處游勇如有

捏造謠言從中搆毀情事並著該督嚴拏懲辦以靖地方郭松林一軍暫紮彰德既恐軍食難繼應否就運河附近屯駐著李鴻章酌奪辦理本日據文盛等奏勸捐駝隻足數二千之數見准李鴻章函令徑解直隸行營請旨遵行等語此項駝隻應否全數解赴直隸抑或分撥陝西以資轉運之處著李鴻章酌量情形咨照文盛妥爲撥解○諭楊昌濬興修湖州府屬水利○廣安徽壽州學額六名亳州二名○飭山東河南撥銀十五萬兩備吉林軍需○甲辰諭內閣曾國藩奏瀝陳病目情形懇請另簡賢能畀以兩江重任俟津事奏結再請開大學士缺專心調理一摺兩江事務殷繁職任綦重曾國藩老成宿望前在江南多年情形熟悉措置咸宜見因目疾未痊但得該督坐鎮其閒諸事自可就理該督所請另簡賢能之處著毋庸議仍著俟津事奏結後卽行前赴兩江總

督之任毋再固辭○諭軍機大臣等左宗棠穆圖善奏各軍剿賊獲勝情形一摺甘省駐紮鎮番金縣北山河干鎮等處官軍分投雕剿賊股均獲勝仗尙屬得手惟回逆醜類繁多肆行竄擾必須各路一體探蹤截擊方不至伺隙奔突勢成蔓延著左宗棠穆圖善督飭各營統領勤加偵探遇賊卽擊隨時認真防範以遏賊氛河州尙有回眾十萬餘人並駐紮陝回二萬餘回目馬占鰲有八九月間欲與官兵打仗之說亟應先事豫防左宗棠等務當悉心布置毋爲該逆所乘其附省各營卽著穆圖善妥爲調度以備不虞本日據穆圖善奏省垣各軍索餉滋事已分別嚴行懲辦因思甘軍協餉均歸西征糧臺轉發左宗棠自當統籌全局均勻撥放方足以服眾心此次因撥餉改充糧價以致省垣各軍藉口滋事嗣後該大臣當不分畛域體恤兵艱將甘省各營餉精軍火源源

按濟母令缺乏甘軍楚軍不可微分厚薄免致各營援爲口實並  
著與穆圖善彼此和衷商辦毋稍膜視將此由五百里各諭令知  
之○命張之萬赴江甯會訊張汶詳獄○予故兩江總督馬新貽  
安徽建祠○乙巳諭軍機大臣等奎昌奏查勘俄國已立界牌鄂  
博一摺奎昌見已與俄國立界官穆魯木策傅公同履勘由塔城  
所屬之瑪呢圖噶圖勒幹卡倫起至賽哩鄂拉止查明俄國已立  
牌博四處均在原議分界處所建立尙無侵占已飭令弁兵等在  
俄國所立牌博內建立界牌鄂博四處辦理尙妥惟塔爾巴哈台  
山嶺等處尙有俄國已立牌博未經勘定該大臣見行抵霍野爾  
莫多地方與俄國立界官會商往查仍著按照圖約循依綫道詳  
細確切勘明毋任暗中侵越以重邊防此次隨同立界委員明魁  
等均著照所請先行賞戴翎頂如能始終奮勉事竣後准與出力



官兵一併覈實保奏以示鼓勵分界既定中外疆域分別彼此可以相安然政貴經久弊必豫防若不振刷精神隨時偵察恐日久懈生奎昌尤當督飭兵弁將設立牌博各邊界時加巡查不得稍涉大意其應如何嚴定章程以垂久遠之處著該大臣悉心妥籌奏明辦理將此由五百里諭令知之○己酉諭內閣李鴻章調補直隸總督著卽馳赴天津會同曾國藩丁日昌成林查辦事件工部尙書毛昶熙著卽回京供職○廣山東沂水縣學額六名平陰二名○辛亥諭軍機大臣等總理各國事務衙門奏請飭李鴻章迅赴天津等語昨據曾國藩等奏稱審訊滋事各犯確有證供應正法者得七八人略有證供應治罪者約二十餘人第案情重大各國傷斃商民亦多著李鴻章迅速馳赴天津會同曾國藩丁日昌成林督飭承審各員將案內得有正供各犯認真研鞫毋任時

認時刻及早擬結至天津府縣所具親供內有應行覆訊及與六月二十五日曾國藩奏到查明滋事大概情形摺內情節不符之處仍著曾國藩等迅速覆訊明確一面將該革員等解交刑部聽候覈辦一面將覆訊供詞據實具奏另片奏請飭成林接統津郡防軍等語天津海防關繫緊要所有崇厚任內練習洋槍各隊卽著成林接統督同天津通永鎮總兵大沽協副將認真訓練不得稍有懈弛其各營軍餉及需用軍火器械等項均著悉照舊章覈實辦理○癸丑諭軍機大臣等總理各國事務衙門奏請仍遵前旨飭令提督陳國瑞赴津查訊等語已諭令神機營王大臣派員伴送該提督赴津並飭將要犯周起濇交出由曾國藩等訊辦矣陳國瑞抵津後應卽取具切實親供以憑覈辦著曾國藩等督飭承審各員將應行查訊各節向該提督查訊明確令其切實登覆

毋稍含混俟遞供訊結後再行飭令回京其周起瀝一犯交出後卽著歸案嚴訊原片均著鈔給閱看○甲寅諭軍機大臣等李鴻章奏起程赴津一摺天津一案曾國藩等擬於八月二十三日先行奏結自己辦有眉目卽著妥速定擬剋期具奏不得再有遲逾據李鴻章奏稱正法八人與議罪二十餘人辦法不爲不重等語著曾國藩等將未獲之犯趕緊勒限嚴拏並將見獲各犯認真研鞫不得稍涉寬縱致令兇徒漏網至天津府縣所具親供內有應行嚴訊之處諒已早經訊明一面將覆訊供詞迅速具奏一面將該革員等於接奉此旨後卽日解交刑部聽候覈辦限於八月二十五日到部本日據醇郡王等奏遵將陳國瑞派員伴送赴津該督等於詢畢後將該提督親供卽行具奏仍令原派之員將陳國瑞卽日伴送回京要犯周起瀝交出後卽著歸案訊辦將此由六

百里各密諭知之○諭蘇鳳文等奏官軍攻剿叛匪全○湯平暨  
派防鎮安邊境及籌辦苗土等匪情形各摺片安邊河陽等處賊  
匪全數殲除剿辦尙爲得手惟首逆梁添錫一犯僅據賊供中礮  
落水賊屍猶未撈獲其黃崇英一犯逃匿不知去向亟應確實查  
明該逆等實在下落迅速殄滅毋任漏網馮子材見駐河陽卽著  
趕緊搜捕餘匪督率入關毋得久畱夷境致滋擾累另股土匪屯  
踞保樂夷境距鎮安不遠蘇鳳文當嚴飭謝繼貴等實力堵剿並  
著馮子材派撥勁旅會合夾擊毋令逸匪潛入至柳慶邊境時有  
苗匪滋擾南太泗鎮思恩等府土匪尙多著蘇鳳文飭令各該地  
方官會同防剿各軍認真堵擊不得有名無實馮子材凱還時於  
各屬應剿應防處所務當分兵布置妥籌辦理以靖地方將此由  
五百里各諭令知之○諭蘇鳳文奏越南國王呈請遣使進貢一

摺越南國王恪守藩封素稱恭順此次因該國被匪竄擾經大兵越境剿辦次第蕩平懇請遣使呈進方物及馴象二隻情詞肫懇忱悃可嘉自應准其呈進俾遂愛戴之忱著蘇鳳文查照歷屆例貢進關之時酌定日期一面具奏一面行令該國王遵照辦理至該國上次補進丁巳辛酉乙丑等年貢物前已命抵下三屆癸酉丁丑辛巳等年正貢茲據該國王懇請賞收具見至誠惟朝廷厚往薄來優待外藩向遇補進方物均有畱抵之旨著蘇鳳文傳知該國王仍遵前旨畱抵下三屆正貢以示體恤將此諭令知之○以廣西官軍剿辦越南安邊等處賊匪蕩平賞副將劉玉成父母二品封典遊擊黃興仁巴圖魯名號餘加銜升敘開復有差○己未諭軍機大臣等曾國藩等奏審明天津案內各犯分別定擬開單呈覽並天津府縣未能剋日解京各摺片天津滋事一案爲時

已久必應趕緊辦結曾國藩等以此案棘手甚多礙難拘守常例不得不變通辦理見據訊明各犯擬辦正法者十五人擬辦軍徒者二十一人既屬供證確實情真罪當卽著照所擬辦理其情節較重訊有端倪供證尙未確實之犯仍著認真研鞫迅速定擬具奏未獲各犯並著上緊飭緝歸案訊辦至所稱將來第二批奏結或再辦首從犯各數名或與洋人訂定抵償實數由總理衙門覈定行知等語所奏殊屬拘泥此次津民逞忿滋事幾致釀變案情重大自不得不嚴行懲辦但衡情定罪惟當以供證爲憑期無枉縱豈能豫爲懸擬強人就案著曾國藩等審訊明確持平定擬不必拘定成見至應行正法各犯著俟刑部議奏已革天津府張光藻等罪名時再降諭旨前諭該督於本月二十五日將革員等解交到部何以遲遲未經起解著曾國藩等仍遵前旨迅將該革員

等解交刑部聽候覈辦毋庸俟陳國瑞到津質訊以期迅速曾國藩另片奏請令丁日昌著俟李鴻章到津後卽行回任等語丁日昌著俟李鴻章抵津商辦一切後再行請旨曾國藩因此等辦理遲延自請交部嚴議著加恩寬免○諭沈葆楨奏請簡派輪船統領一摺據奏新設輪船約束操演以及稽查聯絡其難較戰船數倍亟需知兵大員統率藉資訓練福建水師提督李成謀前隸楊岳斌外江水師疊著戰功著作爲輪船統領英桂沈葆楨卽傳諭該提督務當申明紀律嚴加約束以肅營規兵船恃槍礮爲聲威若技藝生疏非特不能制勝且臨敵蒼黃將有自焚之患近日輪船所用槍礮多於後膛安放子藥英桂等卽責成李成謀隨時駕駛出洋周歷海島勤加操演俾該員弁等熟習風濤悉成勁旅不得性耽安逸致令訓練皆屬具文有名無實輪船號數漸多不能

不分布各口若彼此各不相習勢必心志不齊難期用命李成謀  
身爲統領尤當將各船聯絡一氣以壯聲援將此各諭令知之○  
辛酉諭軍機大臣等李瀚章奏會匪聚眾滋事立時撲滅一摺本  
年七月間哥弟會匪首楊竹客卽楊玉春在湖北宣恩縣境糾黨  
起事圖撲縣城經該縣知縣向光謙督同紳團兜捕當將匪首楊  
竹客等擒獲正法餘黨解散辦理尙爲迅速所有在事尤爲出力  
官紳著准其酌保數員以示鼓勵近來此等匪徒到處結會隨地  
糾人實爲東南數省隱患前據劉崐奏報內湖南湘鄉瀏陽均有  
會匪滋事之案見宣恩地方復有此事該處界連川楚匪首楊竹  
客又係四川彭水縣人雖已殲擒恐尙有伏莽潛藏乘間竊發著  
李瀚章吳棠郭柏蔭劉崐各飭所屬一體趕緊查拏隨時互相知  
照毋任此拏彼竄並力行保甲整頓團練以期消患未萌該督撫



等職任封圻責無旁貸務當嚴飭各該地方官實力稽查認真搜捕盡絕根株毋得日久生懈將此由五百里各諭令知之○壬戌詔整頓京師捕務○癸亥諭軍機大臣等曾國藩等奏遵解天津府縣赴部並鈔錄陳國瑞供詞呈覽請令丁日昌回任各摺片張光藻等既經解部該革員等應得罪名刑部自當秉公定擬至陳國瑞所遞親供既與津案並無干涉卽毋庸再令總理衙門刑部覈辦江蘇地方緊要見在天津之事既有李鴻章會同曾國藩等辦理丁日昌卽著速行回任以重職守所有天津應訊應緝各犯仍著曾國藩等趕緊辦結總以愈早愈妙曾國藩另片密陳傳教情形已令總理各國事務衙門妥議矣將此由五百里各密諭知之○諭豫師奏團勇會剿回匪克復賊寨及出省籌辦後路各摺片高寨白馬寺等處踞匪見經豫師飭令團勇會同官兵兜剿該

逆渡河而逸立將高寨全溝克復白馬寺一帶業已肅清惟大股回匪尙踞河南老巢亟應迅圖剿滅著豫師飭令李春海等協同該處團丁乘勝進攻直擣逆巢務當埽穴擒渠毋畱餘孽西碾紳民捐貲殺賊尙屬著有微勞著准其擇尤酌保以示鼓勵豫師出省後擬暫駐平番著將後路事宜趕緊籌辦俟部署稍定卽親率勇隊馳赴前敵相機進剿迅殄逆氛將此諭令知之○是月緩徵直隸定州等十州縣被旱新舊額賦暨山東濮州被旱本年上忙錢糧